

微笑。從其面門。出五色光。遶佛三匝。還從頂入。爾時阿難。而白佛言。如來尊重。不妄有笑。以何因緣。今者微笑。唯願世尊。數演解說。佛告阿難。汝今見是守園貧人。施我焦木。阿難白言。唯然已見。彼貧人者。以信敬心。施我焦木。善根功德。於未來世。經十三劫。不墮地獄。畜生餓鬼。天上人中。常受快樂。最後身得成辟支佛。號曰離垢。廣度眾生。不可限量。是故笑耳。爾時諸比丘。聞佛所說。歡喜奉行。

一一九、作樂供養成辟支佛緣

佛在舍衛國祇樹給孤獨園。時彼國中豪貴長者。各自莊嚴。著好服飾。瓔珞環釧。齎持香花。作倡伎樂。皆共相將。欲出城外遊戲自樂。到城門中。值佛世尊。將諸比丘。著衣持鉢。入城乞食。時彼諸人。見佛如來。圓光晃昱。三十二相。八十種好。光明暉曜。如百千日。各懷歡喜。前禮佛足。作倡伎樂。供養佛僧。各以所捉種種雜花。而散佛上。於虛空中。變成花蓋。佛以神力。遍覆舍衛。時諸人等。見是變已。歎未曾有。即便以身。各各五體投地。因發誓

願以此作倡伎樂善根功德。使我來世得成正覺。廣度眾生。如佛無異。發是願已。佛即微笑。從其面門。出五色光。遶佛三匝。還從頂入。爾時阿難。而白佛言。如來尊重。不妄有笑。以何因緣。今者微笑。唯願世尊。敷演解說。佛告阿難。汝今見此諸人等。不阿難白言。唯然已見。此諸人等。以其作樂散花供養善根功德。於未來世。一百劫中。不墮地獄畜生餓鬼。天上人中。常受快樂。最後身得成辟支佛。皆同一號。名曰妙聲。廣度眾生。不可限量。是故笑耳。爾時諸比丘。聞佛所說。歡喜奉行。

三〇、劫賊惡奴緣

佛在舍衛國祇樹給孤獨園。時彼城中有一愚人。名曰惡奴。心常好樂處處藏竄劫奪人物。用自存活。時有比丘。在於塚間坐禪行道。食時欲至。著衣持鉢入城乞食。時有長者。見彼比丘。威儀庠序（正）。心生信敬。即入舍內。取一張氎（布）。施彼比丘。還詣塚間。值彼賊人。見是比丘持氎來至。便從索取。比丘即與。明日更來。復從索褥。次復持與。於第三日。比丘乞